

Hari Perhutanan Sedunia terap budaya pulihara hutan

Oleh **S.CONNIE PEARL SUIL**
conypearl09@gmail.com
UB 29.03.2012 A8

KOTA KINABALU: Sekolah Perhutanan Tropika Antarabangsa (SPTA), Universiti Malaysia Sabah (UMS) mengadakan sambutan Hari Perhutanan Sedunia (HPS) bagi usaha menerap budaya prihatin dalam pemeliharaan dan pemuliharaan hutan.

Naib Cancellor UMS, Brig Jen Prof Datuk Seri Panglima Dr. Kamaruzaman Ampon, berkata HPS yang disambut pada 21 Mac setiap tahun merupakan simbol betapa pentingnya menghargai dan memelihara hutan untuk kesejahteraan dan warisan generasi kini dan akan

datang.

“Ia sekaligus memberi kesedaran kepada masyarakat tentang kepentingan hutan serta memupuk rasa cinta untuk terus memuliharanya,” katanya pada Majlis Hari Perhutanan Sedunia UMS, di sini kelmarin. Teks ucapannya dibacakan oleh Timbalan Naib Cancellor (Penyelidikan dan Inovasi), Prof Dr. Mohd. Harun Abdullah.

Menurutnya, dengan usaha menanam sebatang pokok di sekitar rumah mampu membantu dalam mengurangkan kadar kepanasan di sekitar itu.

“Dianggarkan sebatang pokok yang ditanam dapat menyerap kira-kira satu



HARUN (kiri) menanam anak pokok sebagai simbolik Hari Perhutanan Sedunia.

tan karbon dioksida semasa hayatnya.

“Bayangkan dengan 300 batang pokok yang ditanam, ia umpama dapat mengimbangi pencemaran yang dilakukan oleh satu individu dalam seumur hidupnya,” katanya.

Beliau berkata, sudah tiba masanya masyarakat untuk mengubah paradigma dalam menjadikan dunia sebagai tempat selamat untuk didiami pada masa kini dan

hadapan.

“Menanam lebih banyak pokok sudah pastinya mampu mengurangkan kesan pencemaran dan pemanasan global.

“Pokok bertindak sebagai penapis pencemaran udara, mencegah hakisan tanah, dan menyejukkan alam sekitar.

“Oleh itu, memupuk cintakan alam semula jadi sedikit sebanyak mampu merubah minda masyarakat terhadap pentingnya alam

kehijauan dalam kehidupan,” katanya.

Tambahnya, sambutan HPS peringkat UMS kali ini turut disertai oleh kanak-kanak dan beberapa buah sekolah rendah yang mengambil bahagian dalam acara mewarna dan edutalk.

Turut hadir, Dekan Sekolah Perhutanan Tropika Antarabangsa, Dr. Normah Awang Besar dan tetamu kehormat yang lain.



NORMAH (kiri) menyampaikan cenderahati kepada Harun.